

渤海國志長編

冊六

渤海國志長編卷十五

遼陽金毓黻 撰集

職官考第二

渤海國志十三

渤海職官壹遵唐制惟名號稍異唐書本傳略具其凡取以校百官志所次多得其比擬之迹冊府元龜紀朝唐諸臣具官稱者僅數人不若日本史所紀之詳茲以唐書本傳爲主而以見於中外古籍者補其未備並爲之說於下備考覽焉

政堂省

大內相一人

居左右相上

典領百司其屬有六卿一曰忠部卿二曰

仁部卿三曰義部卿四曰智部卿五曰禮部卿六曰信部卿庶

政皆會決焉

謹案唐書百官志

以下簡稱唐志

尙書省尙書令一人正二品掌

典領百官其屬有六尙書一曰吏部二曰戶部三曰禮部
四曰兵部五曰刑部六曰工部庶務皆會決焉據此則渤海政堂省正比唐尙書省大內相正比尙書令蓋典領百司會決庶政職之最尊者也所屬六卿亦以比唐之六部尙書

又案遼史本紀云太祖天顯元年命惕隱等將萬騎爲先鋒遇譴讓老相兵破之又云改渤海國爲東丹以渤海老相爲右大相疑此老相即渤海內大相以其位尊故以老稱之也

左右司政各一人

居左右平章事之下

爲大內相之貳

謹案唐志尙書省左右僕射各一人從二品掌統理六官爲令之貳令闕則總省事據此則左右司政正比唐之左

右僕射爲大內相之貳者也

又案東國通鑑高麗太祖九年春契丹滅渤海司政大元鈞等前後來奔此即政堂省左右司政之官

左右允各一人爲司政之佐分總左右六司之事

謹案唐志尙書省左丞一人正四品上右丞一人正四品下掌辨六官之儀糾正省內吏部戶部禮部左丞總焉兵部刑部工部右丞總焉據此則左右允正比唐之左右丞分總左右六司之事者也

謹案日本史載渤海聘使楊成規王文矩賀福延烏孝愼皆官政堂省左允王新福行左允此其證也

左三部六司

忠部卿一人

居司政下
餘放此

少卿一人掌文選勳封考課之政其屬

司有二一曰忠部爲正司二曰爵部爲支司

忠部郎中一人掌之員外郎額未詳

爵部郎中一人掌之員外郎額未詳

謹案唐志吏部尙書一人正三品侍郎二人正四品上掌
文選勳封考課之政以三銓之法官天下之材其屬有四
一曰吏部二曰司封三曰司勳四曰考功各設郎中員外
郎掌之據此則忠部卿正比唐之吏部尙書少卿正比唐
之侍郎其屬司亦正比唐吏部之所屬唐志司封原名主
爵此渤海爵部之所仿也蓋併司封司勳考功爲一而名
之曰爵部或將考功併入吏部釐爲兩司以國小事簡也
唐書稱爵部曰支司以下各部俱有支司則忠部爲正司矣又各司
有郎中員外唐制以郎中一人掌其事故此亦定爲一人

員外郎或不止一人故云額未詳下放此

又案唐書本傳不載諸部有少卿惟冊府元龜載有和部少卿裴璆朝貢於梁又日本史載有和部少卿是諸部有少卿而唐書失載也又日本史載渤海聘使有政堂省少卿高承祖亦諸部少卿也茲特補入

仁部卿一人少卿一人掌土地錢穀之政貢賦之差其屬司有二一曰仁部爲正司二曰倉部爲支司

仁部郎中一人掌之員外郎額未詳

倉部郎中一人掌之員外郎額未詳

謹案唐志戶部尙書一人正三品侍郎二人正四品下掌天下土地人民錢穀之政貢賦之差其屬有四一曰戶部二曰度支三曰金部四曰倉部據此則仁部以擬唐戶部

也又併度支金部於仁部故倉部之名獨存

義部卿一人少卿一人掌禮儀祭享貢舉之政其屬司有二一曰義部爲正司二曰膳部爲支司

義部郎中一人掌之員外郎額未詳

膳部郎中一人掌之員外郎額未詳

謹案唐志禮部尙書一人正三品侍郎一人正四品下掌禮儀祭享貢舉之政其屬有四一曰禮部二曰祠部三曰膳部四曰主客據此則義部以擬唐禮部也蓋以祠部併於義部主客併於膳部故祇設二司

右三部六司

智部卿一人少卿一人掌武選地圖車馬甲械之政其屬司有二一曰智部爲正司二曰戎部爲支司

智部郎中一人掌之員外郎額未詳

戎部郎中一人掌之員外郎額未詳

謹案唐志兵部尙書一人正三品侍郎二人正四品下掌武選地圖車馬甲械之政其屬有四一曰兵部二曰職方三曰駕部四曰庫部據此則智部以擬唐兵部也唐高宗龍朔二年曾改兵部曰司戎此渤海戎部之所由仿也蓋武選地圖之事智部掌之車馬甲械之事戎部掌之

禮部卿一人少卿一人掌律令刑法徒隸案覆讞禁之政其屬司有二一曰禮部爲正司二曰計部爲支司

禮部郎中一人掌之員外郎額未詳

計部郎中一人掌之員外郎額未詳

謹案唐志刑部尙書一人正三品侍郎一人正四品下掌

律令刑法徒隸案覆讞禁之政其屬有四一曰刑部二曰都官三曰比部四曰司門據此則禮部以擬唐刑部也唐高宗龍朔二年玄宗天寶十一載皆嘗改比部曰司計此渤海計部之所由仿也蓋以禮部掌律令刑法之政計部掌徒隸案覆讞禁之政此二司之所由分也

又案東國通鑑載渤海亡時有禮部卿大和鈞來奔此其證也

信部卿一人少卿一人掌山澤屯田營造之事其屬司有二一曰信部爲正司二曰水部爲支司

信部郎中一人掌之員外郎額未詳

水部郎中一人掌之員外郎額未詳

謹案唐志工部尙書一人正三品侍郎一人正四品下掌

山澤屯田工匠諸司公廨紙筆墨之事其屬有四一曰工部二曰屯田三曰虞部四曰水部據此則信部以擬唐工部也此蓋以屯田虞部併入信部故設二司掌之

又案日本史裴璆官信部少卿見醍醐天皇帝延喜二十年告身敕書

又案日本史渤海有工部郎中呂定琳往聘又高麗史載渤海亡時有工部卿大福薨來奔似渤海亦名信部爲工部或以至異國改稱此名如日本式部少輔菅原道真改稱禮部侍郎之例

又案裴璆高南容皆官和部少卿似和部亦爲六部之一例以信部又名工部則其他諸部難保不無異名也

又案唐志六尚書吏部兵部爲前行戶部刑部爲中行禮

部工部爲後行行總四司以本行爲頭司餘爲子司此又
渤海各部正司支司之所由仿也

孔目額未詳

謹案日本史載渤海聘使楊中遠官政堂省孔目是蓋唐
尙書省都事主事之類左右允以下之屬曹也

宣詔省

左相一人掌出納王命凡國之政事與內大相右相參總而專
判省事

謹案唐志門下省侍中二人正二品掌出納帝命相禮儀
凡國家之務與中書令參總而顓判省事高宗龍朔二年
玄宗天寶元年皆改稱侍中爲左相此宣詔省當唐之門
下省左相當侍中而名曰左相亦仿唐制也宣詔省旣與

中臺省並設且以宣詔命名則其職掌與唐門下省同自
不待言

又案高麗史崔彥撝傳紀渤海宰相烏炤度朝唐此王瑋
璿年間事也惟未詳其爲左相或右相又冊府元龜稱大
諲譔差其相大誠諤朝貢此皆渤海宰相之僅見者

左平章事一人侍中一人爲左相之貳

謹案唐志門下省門下侍郎二人正三品掌貳侍中之職
又唐代有同中書門下平章事即謂同侍中中書令亦宰
相也渤海之平章事蓋仿於此然其職旣居左相之下蓋
如唐之門下侍郎同中書門下平章事至其所謂侍中乃
侍郎之異名即如唐之門下侍郎平章事與侍中同處左
相之下故皆以貳名之

又案遼太祖改渤海國爲東丹以其弟迭剌爲左大相渤海司徒大素賢左次相疑左大相即左相左次相即左平章事國號雖改而官制猶仍其舊也

左常侍諫議掌侍從顧問諷諫過失員額未詳

謹案唐志門下省左散騎常侍正三品下掌規諷過失侍從顧問左諫議四人正四品下掌諫諭得失侍從贊相此所謂左常侍蓋比唐左散騎常侍諫議比唐左諫議大夫蓋二官非一名也然中臺省無右常侍及諫議之官豈唐書失載歟

又案日本史載渤海聘使有獻可大夫史都蒙匡諫大夫呂定琳其職名皆與諫議大夫爲近豈諫議之別稱歟其詳不可考矣

中臺省

右相一人掌司王言執國政與大內相左相參決而總判省事
謹案唐志中書省中書令二人正二品掌佐天子執大政
而總判省事凡王言宣署申覆然後行高宗龍朔二年玄
宗天寶元年皆嘗改中書令爲右相此中臺省即仿唐中
書省而右相即中書令之職也其職掌亦與唐中書省同
右平章事一人內史一人爲右相之貳

謹案唐志中書省門下侍郎二人正三品掌貳侍中之職
此右平章事即唐中書侍郎同中書門下平章事內史即
中書侍郎也隋名中書令曰內史令其下有內史唐武后
光宅元年則改中書令爲內史此以內史貳右相則隋內
史之職也右平章事及內史同處右相之下故皆以貳名

之

又案冊府元龜載渤海使臣高寶英官同中書右平章事此中書蓋即中臺比以唐制故曰同中書即中臺省之右平章事也

詔誥舍人掌草擬詔誥修記王言員額未詳

謹案唐志中書省舍人六人正五品上掌侍進奏參議表章凡詔旨制敕皆起草進畫其後或以他官兼知制誥又起居舍人二人從六品上掌修記言之史此即詔誥舍人之所仿也惟詔誥舍人爲一官抑二官則不能詳

又案日本史紀渤海聘使持國書及中臺省牒及使臣返日本亦予以國書及太政官牒此必依仿唐制又以中臺省比於日本之太政官則其職必重於他省矣

中正臺

大中正一人

居司政下

掌以刑法典章糾正百司之臯惡

少正一人爲大中正之貳餘官未詳

謹案唐志御史臺大夫一人正三品中丞二人正四品下大夫掌以刑法典章糾正百官之臯惡中丞爲之貳此中正臺即此唐御史臺大中正即比御史大夫少正即比御史中丞

又案唐制大夫中丞下有侍御史殿中侍御史監察御史各若干人渤海中正臺大中正少正以下之官疑稱中正以比唐御史唐書不載蓋從略耳

殿中寺

大令一人掌國王服御之事

少令一人爲大令之貳餘官未詳

謹案唐志殿中省監一人從三品少監二人從四品上監掌天子服御之事此殿中寺之所仿也

又案唐制少監下尙有丞二人從五品上其屬有六局渤海當亦有屬官特唐書從略耳下諸寺監司局皆放此又案冊府元龜載渤海朝梁使有殿中少令崔光禮即其證也

宗屬寺

大令一人掌王族親屬籍

少令一人爲大令之貳餘官未詳

謹案唐志宗正寺卿二人從三品少卿二人從四品上掌天子族親屬籍以別昭穆此宗屬寺之所仿也又武后光